

**PM Tunai Solat Hajat Doakan Keselamatan Palestin
Bernama
23 November, 2012**

PUTRAJAYA, 23 Nov (Bernama) -- Perdana Menteri Datuk Seri Najib Tun Razak pada Jumaat menyertai ribuan umat Islam menunaikan solat Jumaat dengan bacaan qunut Nazilah serta solat hajat di Masjid Putra di sini bagi mendoakan keselamatan penduduk Palestin yang sedang berdepan dengan kekejaman Israel.

Terdahulu Najib mendengar khutbah Jumaat khas yang disampaikan oleh Imam Besar Masjid Putra, Abdul Manaf Mat, bertajuk Tangisan Gaza, yang berkisar mengenai tragedi yang menimpa rakyat Palestin di Gaza ketika ini.

Serangan Israel ke atas wilayah Gaza sejak minggu lepas mengakibatkan lebih 100 penduduk Gaza terbunuh termasuk kanak-kanak dan warga tua, di samping mencederakan ratusan yang lain.

Dua hari lepas Menteri di Jabatan Perdana Menteri Datuk Seri Jamil Khir Baharom dilaporkan meminta semua masjid dan surau mengadakan solat hajat dan bacaan Qunut Nazilah bagi mendoakan keselamatan penduduk Palestin sebagai satu daripada inisiatif bagi menunjukkan sokongan Malaysia kepada penduduk Palestin.

Masjid utama di bawah Jabatan Kemajuan Islam Malaysia iaitu Masjid Negara, Masjid Putra, Masjid Tuanku Mizan Zainal Abidin dan Masjid Wilayah Persekutuan serta seluruh masjid di Wilayah Persekutuan juga berbuat demikian, di samping menyampaikan khutbah khas Jumaat.

Selesai solat Jumaat, Perdana Menteri bersama makmum yang lain menunaikan solat hajat dua rakaat sebelum beredar, dan yang turut kelihatan di masjid ialah Menteri Kemajuan Luar Bandar dan Wilayah Datuk Seri Mohd Shafie Apdal.

-- BERNAMA

Copyright © 2012 BERNAMA

Source: <http://www.bernama.com/bernama/v6/bm/newsindex.php?id=711042>